

Sin fossa da

8.11.85 GR

Gion Andriu Monn, Sedrun

L.J. Mesjamna, ils 16 d'octobre 1985, ha il zenn da bara da sogn Vigeli annunziau la mort da nies car convinschin, cantadur e caluster Gion Andriu Monn-Deragisch. In proverbi latin secloma: «Una est ultima» – Ina ei tia davosa ura! La mesjamna a bunura ei nies bien caluster ius tier siu Scaffider. Nus Stein consterni e deprimi avon sia bara. Ina glisch plein carezia ei stizzada. Ina tgeuadat immensa ed ina tristeza profunda paran d'embratschar il mund entir. Denton astgein nus buca piarder la curascha. La carezia divina ei denter nus carstgauns ed il Segner ha empermess a nus tutt baul ni pli tard la legria perpetna.

Il car defunct Gion Andriu Monn ei naschiu ils 9 d'octobre 1907 a Sedrun sco fegl da Gion Andriu Monn e Barla Catrina, nata Venzin. En semplas, mudestas relaziuns eis el carschius si cun 4 soras ed in frar. Quels tutt han gia fatg il viadi grond ella patria celestriala. Il bab ha Gion Andriu piars gia cun dus onns aschia ch'el ha strusch enconuschiu el. Ei ha tuccau ad uras da semetter alla lavur, da suar e barhar cun mumma e fargliuns per nutrit la famiglia. Entras unitad e cooperaziun vicendeivla damognan els lur greva situaziun ed il Segner ha benediu lur operar.

Il bien defunct ha mai bandunau sia cara Val Tujetsch. Mo a quella ha el surviu admirablamein. El ei daven-taus in um da respect, in um carezau ed in exempl per biars. Cun 17 onns entra el el chor-baselgia e leu ha el cantau duront 58 onns cun grond entusiassem per honour e laud dil Segner e dil concarstgaun. Ils 30 da matg 1985 ha nies car augsegner, sur Giusep Ca-thomas, astgau surdar al defunct la medaglia papala «Bene merenti». Il



defunct Gion Andriu ha era cantau duront plirs decennis el chor mischedau. Plinavon ha el era sunau ella musica instrumentalala da Sedrun, dalla quala el ei medemamein commember d'honor. Las bandieras dallas sura societads ein sesbassadas sur sia fossa, rendend salids ed engraziamenti.

Igl onn 1947 marida il giuven Gion Andriu la stupenta e biala matta da Gonda: Ursulina Deragisch. Ei vegn fatg il pur sco tochen dacheu. Il Segner benedescha la lètg cun 10 affons dils quals 9 ein aunc en veta e pliran sper la bara dil car bab. En famiglia vegn ei luvrau, urau e cantau. Ils buns geniturs sedattan tutta breigia per il beinstar dalla famiglia e dils convi-schins. Il defunct Gion Andriu ha

adempliu in grond pensum terrester. Educar, nutrit e vestgir 9 affons ei in pulit buordi. Tonaton ha el adina giu temps per cant e musica.

Sper il grond quitau per la famiglia ei il defunct s'engaschaus per la cultura dil vitg ed ella val. El ei era staus in teatrist da vaglia che ha giugau da siu temps rollas e rollas. La preferenza ha el dau plitost a rollas humoristicas, mo el pudeva era bargir, sch'il regis-sur pretendeva. Sia lavour principala, far il pur, ha il defunct Gion Andriu adempliu cun perschuasiun tochen alla mort. Schegie da statura zaclina e falombra, ha el adina luvrau cun inschign e cun plascher ed aschia procurau per contentientscha e satisfacziun.

Igl onn 1965 elegia la vischnaunca (lu aunc buca pleiv) il defunct sco caluster da s. Vigeli. Varga 20 onns ha el adempliu – ensemens cun sia cara famiglia – quei uffeci per cumpleina contentientscha da tutt parochians. Monsignur uestg Gion ha honorau ils 19 da mars 1985 nies caluster profilau cun in attest d'engraziament e benedicziun.

Il defunct Gion Andriu Monn ei staus in carstgaun emperneivel en cumpagnia, in fideivel e carezau amitg per reh e pauper ed in carstgaun da profunda cardientscha. Adina ha el era rugau per ina bona mort. Jeu sun perschadius ch'el ha giu la grazia d'ina bona mort. Als ses ha el relaschau in custeivel bein: la cardientscha. Quei bein vegn adina puspei a regurdar ses descendants ad in bab beinvulente e premurau.

Cun la mort da nies caluster Gion Andriu ei ina veta da speranza e carezia ida alla fin. In bab da famiglia exemplaric ed in bien amitg ei buca pli. Baul u tard ston tutt far enconuschiantscha cun quella petradad. Denton, la carezia da Diu ha il davos plaid, in plaid da speranza perpetna. – Alla famiglia en malencurada exprimin nus nossa condolentscha sincera e profunda. Il Segner detti al defunct Gion Andriu il ruau perpetua e la glisch perpetna sclareschi ad el!